

Қазақстан Республикасының Үкіметі мен Армения Республикасының Үкіметі арасында денсаулық сақтау және медицина ғылымы саласындағы ынтымақтастық туралы келісім жасасу туралы

Қазақстан Республикасы Үкіметінің 2003 жылғы 26 тамыздағы N 867 қаулысы

Қазақстан Республикасының Үкіметі қаулы етеді:

1. Қоса беріліп отырған Қазақстан Республикасының Үкіметі мен Армения Республикасының Үкіметі арасындағы денсаулық сақтау және медицина ғылымы саласындағы ынтымақтастық туралы келісімнің жобасы мақұлданын.
2. Қазақстан Республикасының Денсаулық сақтау министрі Жақсылық Ақмырзаұлы Досқалиевқа Келісімнің жобасына қағидатты сипаты жоқ өзгерістер мен толықтырулар енгізуге рұқсат ете отырып, Қазақстан Республикасы Үкіметінің атынан Қазақстан Республикасының Үкіметі мен Армения Республикасының Үкіметі арасында денсаулық сақтау және медицина ғылымы саласындағы ынтымақтастық туралы келісім жасасуға өкілеттік берілсін.
3. Осы қаулы қол қойылған күнінен бастап күшіне енеді.

Қ а з а қ с т а н Р е с п у б л и к а с ы н ы ң

Премьер-Министрі

**Қазақстан Республикасының Үкіметі мен Армения Республикасының Үкіметі арасындағы денсаулық сақтау және медицина ғылымы саласындағы ынтымақтастық туралы
КЕЛІСІМ**

Бұдан әрі "Тараптар" деп аталатын Қазақстан Республикасының Үкіметі мен Армения Республикасының Үкіметі, тату көршілік пен тең құқықтық қағидаттарды ескеріп, Тараптар мемлекеттерінің егемендігін құрметтей отырып, денсаулық сақтау және медицина саласындағы дәстүрлі байланыстарды қолдау мен дамытуға ұмтылысты назарға ала отырып, Тараптар мемлекеттерінің екеуінің де ұзақ мерзімді әрі тұрақты негіздегі өзара тиімді және тең құқықтық ынтымақтастыққа мүдделілігін ескере отырып, төмендегілер туралы келісті:

1-бап

Осы Келісімнің мақсаттары үшін Тараптар мемлекеттерінің құзыретті органдары: Қазақстан тарапынан - Қазақстан Республикасының Денсаулық сақтау министрлігі; Армения тарапынан - Армения Республикасының Денсаулық сақтау министрлігі.

Тараптар мемлекеттерінің құзыретті органдарының ресми атаулары өзгерген жағдайда Тараптар дипломатиялық арналар бойынша бұл туралы бір-бірін дереу хабардар етеді.

2-бап

Тараптар мемлекеттерінің ұлттық заңнамасына сәйкес Тараптар денсаулық сақтау мен медицина ғылымының мынадай:

Тараптар мемлекеттерінің ересек және бала тұрғындарына алғашқы әрі мамандандырылған медициналық көмек көрсету; профилактикалық медицина;

фармация және медициналық техника, соның ішінде өндіріс;

санаторлық-курорттық емдеу және оңалту;

ғылыми және медициналық кадрларды даярлау;

ғылыми әзірлемелерді бірлесіп жүргізу;

ақпараттық және компьютерлік жүйелерді әзірлеу және денсаулық сақтауға енгізу;

денсаулық сақтауды реформалау;

медициналық статистика;

төтенше жағдайлардың медициналық-санитарлық салдарларының алдын алу және жою;

жедел ақпаратпен алмасу;

аса қауіпті жұқпалы аурулардың таралу қаупі туындаған жағдайда көмек көрсету және өзара іс-қимыл жасау;

дәрілік заттар мен медициналық техниканың сапасын бақылау, оларды стандарттау және сертификаттау;

Тараптар мемлекеттері халықтарының денсаулығын сақтау мен нығайту саласындағы ұлттық бағдарламалардың басым міндеттерін шешудегі ынтымақтастықты дамыту;

бұдан әрі мәтін бойынша "ынтымақтасатын ұйымдар" деп аталатын Тараптар мемлекеттерінің денсаулық сақтау ұйымдары арасындағы байланыстарды кеңейту салаларында өзара тиімді ынтымақтастықты дамытатын болады.

3-бап

Ынтымақтасатын ұйымдар арасындағы өзара қарым-қатынастар Тараптар мемлекеттерінің ұлттық заңнамасына және осы Келісімге сәйкес тиісті шарттарды жасасу жолымен орнатылады.

4-бап

Тараптар бірлескен негізде Тараптар мемлекеттерінің министрліктері мен ведомстволарының қарауындағы емдеу-алдын алу, ғылыми-зерттеу, санаторлық-курорттық және басқа да денсаулық сақтау ұйымдарына емдеу-консультативтік, ғылыми және басқа да ынтымақтастық түрлерін ұйымдастыруға жәрдемдесетін болады.

5-бап

Қабылдайтын Тарап басқа Тарап мемлекетінің азаматтары қабылдап отырған Тарап мемлекетінің аумағында болған кезеңінде оқыс ауырған немесе жазатайым оқиғаға ұшыраған жағдайда Тарап келген мемлекеттің заңнамасына сәйкес оларға қажетті медициналық көмек көрсететін болады.

6-бап

Тараптар съездер, конференциялар мен басқа да сол сияқты іс-шараларды өткізудің жоспарлары туралы бір-бірін хабардар ететін болады. Олар Тараптар мемлекеттерінің ғылыми және медициналық қоғамдары мен басқа да ұйымдарының өтініші мен ұсыныстары бойынша мамандарды қабылдауға көмектесетін болады.

7-бап

Тараптар Дүниежүзілік денсаулық сақтау ұйымы мен басқа да халықаралық ұйымдардың қызметі шеңберінде Тараптар мемлекеттерінің ұлттық заңнамасына сәйкес ынтымақтасуға келіседі.

8-бап

Тараптар Тараптар мемлекеттері импорттайтын адам денсаулығы үшін қауіп өнімді пайдалануға байланысты адамдардың жаппай тамақтан улану мен жұқпалы аурулармен науқастану жағдайларының туындауы туралы бір-бірін дереу хабардар ететін болады.

9-бап

Осы Келісімге Тараптардың өзара келісімі бойынша жекелеген хаттамалармен ресімделетін және осы Келісімнің ажырамас бөлігі болып табылатын өзгерістер мен толықтырулар енгізілуі мүмкін.

Хаттамалар осы Келісімді күшіне енгізу үшін көзделген тәртіппен күшіне енеді.

10-бап

Осы Келісімнің ережелерін түсіндіру мен қолдану жөнінде келіспеушіліктер туындаған жағдайда, оларды Тараптар келіссөздер мен консультациялар жолымен шешетін болады.

11-бап

Осы Келісім белгісіз мерзімге жасалады және дипломатиялық арналар бойынша Тараптардың оны күшіне енгізу үшін қажетті мемлекетішілік рәсімдерді орындағаны туралы соңғы жазбаша хабарлама алынған күннен бастап күшіне енеді.

Осы Келісімді қолдану дипломатиялық арналар бойынша Тараптардың бірі басқа Тарапқа оның қолданысын өзінің тоқтату ниеті туралы жазбаша хабарламаны жіберген күннен бастап алты ай өткеннен кейін тоқтатылады.

200__ жылғы "___" _____ әрқайсысы қазақ, армян және орыс тілдерінде екі түпнұсқа данада жасалған, бұл ретте барлық мәтіннің бірдей күші бар. Осы Келісімнің ережелерін түсіндіру кезінде келіспеушіліктер туындаған жағдайда Тараптар орыс тіліндегі мәтінге жүгінеді.

Қазақстан Республикасының
Үкіметі үшін

Армения Республикасының

Үкіметі үшін